

**БЕКІТІЛДІ**  
**«Виктория» СК» АҚ Директорлар кеңесі**  
**2025 жылдың «13» наурыз № 07 Хаттама**

**«ВИКТОРИЯ» СК» АҚ**  
**ЖЕКЕ НОТАРИУСТАРДЫҢ АЗАМАТТЫҚ-ҚҰҚЫҚТЫҚ ЖАУАПКЕРШІЛІГІН**  
**МІНДЕТТІ САҚТАНДЫРУ**  
**ЕРЕЖЕСІ**

**Алматы қ., 2025 жыл**

**МАЗМҰНЫ**

<b>2. САҚТАНДЫРУ ОБЪЕКТИ.....</b>	<b>4</b>
<b>3. САҚТАНДЫРУ ЖАҒДАЙЫ .....</b>	<b>4</b>
<b>4. САҚТАНДЫРУ СОМАСЫН БЕЛГІЛЕУ ТӘРТІБІ .....</b>	<b>4</b>
<b>5. САҚТАНДЫРУ СЫЙЛЫҚАҚЫСЫН БЕЛГІЛЕУ ЖӘНЕ ОНЫ ТӨЛЕУ ТӘРТІБІ.....</b>	<b>4</b>
<b>6. САҚТАНДЫРУ ШАРТЫН ЖАСАУ ТӘРТІБІ.....</b>	<b>4</b>
<b>7. САҚТАНДЫРУ ШАРТЫНЫҢ ҚОЛДАНЫС МЕРЗІМІ МЕН ЖЕРІ .....</b>	<b>6</b>
<b>8. ТАРАПТАРДЫҢ ҚҰҚЫҚТАРЫ МЕН МІНДЕТТЕР .....</b>	<b>6</b>
<b>9. САҚТАНДЫРУ ТӨЛЕМІН ТӨЛЕУ ҮШІН ҚАЖЕТ ҚҰЖАТТАР .....</b>	<b>8</b>
<b>10. САҚТАНДЫРУ ТӨЛЕМДЕРІН ТӨЛЕУ ТӘРТІБІ МЕН ШАРТТАРЫ.....</b>	<b>8</b>
<b>11. ЗИЯН КЕЛТІРГЕН ТҰЛҒАҒА КЕРІ ТАЛАП ҚОЮ ҚҰҚЫҒЫ.....</b>	<b>10</b>
<b>12. САҚТАНДЫРУШЫНЫ САҚТАНДЫРУ ТӨЛЕМІН ТӨЛЕУДЕН БОСАТУ. САҚТАНДЫРУ ТӨЛЕМІН ТӨЛЕУДЕН БАС ТАРТУ.....</b>	<b>10</b>
<b>13. САҚТАНДЫРУ ШАРТЫН ӨЗГЕРТУ .....</b>	<b>11</b>
<b>14. САҚТАНДЫРУ ШАРТЫН ТОҚТАТУ ШАРТТАРЫ.....</b>	<b>11</b>
<b>15. ЖЕКЕ НОТАРИУСТАРДЫҢ ЖАУАПКЕРШІЛІГІН МІНДЕТТІ САҚТАНДЫРУ ШАРТЫНЫҢ ЖАРАМСЫЗДЫҒЫ .....</b>	<b>11</b>
<b>16. ЖЕКЕ НОТАРИУСТАРДЫҢ АЗАМАТТЫҚ-ҚҰҚЫҚТЫҚ ЖАУАПКЕРШІЛІГІН МІНДЕТТІ САҚТАНДЫРУ БОЙЫНША ДАУЛАРДЫ РЕТТЕУДІҢ ЕРЕКШЕЛІГІ.....</b>	<b>12</b>
<b>17. ҚОСЫМША ЕРЕЖЕЛЕР .....</b>	<b>12</b>

## 1. ЖАЛПЫ ЕРЕЖЕЛЕР

**1.1.** Бұл Жеке нотариустардың азаматтық-құқықтық жауапкершілігін міндетті сақтандыру ережесі (бұдан әрі – «Сақтандыру ережесі») Қазақстан Республикасының Азаматтық кодексіне, 2000 жылғы 18-желтоқсандағы №126-ІІ «Сақтандыру қызметі туралы» Қазақстан Республикасының Заңына, 2003 жылғы 11-маусымдағы №435-ІІ «Жеке нотариустардың азаматтық-құқықтық жауапкершілігін міндетті сақтандыру туралы» Қазақстан Республикасының Заңына (бұдан әрі – «Заң») сәйкес әзірленді.

**1.2.** «Виктория» СК» АҚ (бұдан әрі – Сақтандырушы») осы Сақтандыру ережесінің шарттарымен жеке нотариуспен (бұдан әрі – Сақтанушы») міндетті сақтандыру шартын (бұдан әрі – «сақтандыру шарты») жасау арқылы жеке нотариустардың азаматтық-құқықтық жауапкершілігін міндетті сақтандыруды («жеке нотариустардың азаматтық-құқықтық жауапкершілігін міндетті сақтандыру») жүзеге асырады.

**1.3.** Жеке нотариустардың азаматтық-құқықтық жауапкершілігін міндетті сақтандырудың мақсаты – жеке нотариус нотариалдық іс-әрекеттерді жүзеге асыру нәтижесінде зиян келген үшінші тұлғаларға сақтандыру төлемдерін төлеу арқылы олардың мүліктік мүддесін қорғау.

**1.4.** Қазақстан Республикасының заңнамасымен белгіленген тәртіпте қызмет атқаратын жеке нотариустардың азаматтық-құқықтық жауапкершілігі міндетті сақтандыруға жатады.

**1.5.** Жеке нотариустардың жауапкершілігін міндетті сақтандыру шартын жасамайынша жеке нотариустың нотариалдық іс-әрекет жасауға құқығы жоқ.

**1.6.** Сақтандыру ережесінде келесідей түсініктер қолданылады:

- 1) пайда алушы – осы Заңға сәйкес сақтандыру төлемін алушы болып табылатын тұлға;
- 2) жеке нотариустың азаматтық-құқықтық жауапкершілігі – жеке нотариустың нотариаттық іс-әрекеттерді жасау нәтижесінде келтірілген зиянды өтеуінің Қазақстан Республикасының азаматтық заңнамасында белгіленген міндеті;
- 3) сақтанушы – Сақтандырушымен жеке нотариустың азаматтық-құқықтық жауапкершілігін міндетті сақтандыру шартын жасасқан жеке нотариус;
- 4) сақтандыру төлемі – Сақтандырушы сақтандыру жағдайы басталған кезде Сақтанушыға (Пайда алушыға) сақтандыру сомасы шегінде төлейтін ақша сомасы;
- 5) сақтандыру сыйлықақысы – Сақтанушы Сақтандырушыға соңғысы жеке нотариустың азаматтық-құқықтық жауапкершілігін міндетті сақтандыру шартында айқындалған мөлшерде Пайда алушыға сақтандыру төлемін жүргізу міндеттемесін қабылдағаны үшін төлеуге міндетті ақша сомасы;
- 6) сақтандыру сомасы – сақтандыру объектісі сақтандырылған және сақтандыру жағдайы басталған кезде Сақтандырушы жауапкершілігінің шекті көлемін білдіретін ақша сомасы;
- 7) сақтандыру жағдайы – басталуына орай сақтандыру шарты сақтандыру төлемін жүзеге асыруды көздейтін оқиға;
- 8) сақтандырушы – сақтандыру ұйымы ретінде тіркелген және сақтандыру қызметін жүзеге асыруға арналған лицензиясы бар, сақтандыру жағдайы басталған кезде Сақтанушыға немесе пайдасына шарт жасалған өзге тұлғаға (Пайда алушыға) шартта айқындалған сақтандыру сомасы шегінде сақтандыру төлемін жүргізуге міндетті заңды тұлға;
- 9) үшінші тұлға – жеке нотариустың азаматтық-құқықтық жауапкершілігін міндетті сақтандыру шартының тарапы болып табылмайтын, жеке нотариус жүзеге асыру үшін Қазақстан Республикасының нотариат туралы заңнамасына сәйкес жеке нотариустың азаматтық-құқықтық жауапкершілігін міндетті сақтандыру шартын жасасуға міндетті нотариаттық іс-әрекеттер жасауға байланысты кәсіби міндеттерін жеке нотариустың орындауы кезінде мүліктік мүдделеріне зиян келтірілген тұлға;
- 10) жеке нотариус – нотариаттық іс-әрекетті нотариаттық қызметті жүзеге асыру құқығына арналған лицензия негізінде заңды тұлға құрмай жүзеге асыратын және аумақтық әділет органында есепке алу тіркеуінен өткен Қазақстан Республикасының азаматы;
- 11) франшиза – Сақтандырушыны белгілі бір мөлшерден аспайтын залалды өтеуден босату;
- 12) Уәкілетті орган – қаржы нарығы мен қаржы ұйымдарын реттеу, бақылау және қадағалау жөніндегі орган.

## **2. САҚТАНДЫРУ ОБЪЕКТИ**

**2.1.** Жеке нотариустың нотариаттық қызметтерді жасауы нәтижесінде үшінші тұлғаларға келтірілген зиянды өтеу міндетіне байланысты мүліктік мүдделері жеке нотариустардың азаматтық-құқықтық жауапкершілігін міндетті сақтандыру объектісі болып табылады, оларды жүзеге асыру үшін жеке нотариус Қазақстан Республикасының нотариат туралы заңдарына сәйкес жеке нотариустың жауапкершілігіне міндетті сақтандыру шартын (бұдан әрі - нотариаттық іс-әрекеттер) жасасуға міндетті.

## **3. САҚТАНДЫРУ ЖАҒДАЙЫ**

**3.1.** Жеке нотариустың нотариаттық іс-әрекеттерді жасау нәтижесінде үшінші тұлғалардың мүліктік мүдделеріне келтірілген зиянды өтеу бойынша Сақтанушының азаматтық-құқықтық жауапкершілігінің басталу фактісі жеке нотариустардың жауапкершілігін міндетті сақтандыру шарты бойынша сақтандыру жағдайы деп танылады.

## **4. САҚТАНДЫРУ СОМАСЫН БЕЛГІЛЕУ ТӘРТІБІ**

**4.1.** Жеке нотариустардың жауапкершілігін міндетті сақтандыру шарты бойынша сақтандыру сомасының мөлшері оның талаптарымен белгіленеді және қызметін республикалық маңызы бар қалалар, астана аумағында жүзеге асыратын нотариустар үшін тиісті қаржы жылына арналған республикалық бюджет туралы заңда жеке нотариустардың жауапкершілігін міндетті сақтандыру шартын жасасу күнгі белгіленген - 1000, өзге нотариустар үшін - 500 еселенген айлық есептік көрсеткіштен кем болмауға тиіс.

## **5. САҚТАНДЫРУ СЫЙЛЫҚАҚЫСЫН БЕЛГІЛЕУ ЖӘНЕ ОНЫ ТӨЛЕУ ТӘРТІБІ**

**5.1.** Сақтандыру шарты бойынша сақтандыру сыйлықақысының мөлшері тараптардың келісімі бойынша белгіленеді, бірақ жеке нотариустардың жауапкершілігін міндетті сақтандыру шартының талаптарында айқындалған сақтандыру сомасының 4,5 роцентінен көп болмауға тиіс.

**5.2.** Жеке нотариустардың жауапкершілігін міндетті сақтандыру шарты бойынша сақтандыру сыйлықақысын төлеудің тәртібі мен мерзімдері тараптардың келісімімен белгіленеді.

**5.3.** Егер жеке нотариустардың жауапкершілігін міндетті сақтандыру шартында өзгеше көзделмесе, онда кезекті сақтандыру жарнасының уақтылы төленбегені үшін Сақтанушы Сақтандырушыға өзгенің ақшасын заңсыз пайдаланғаны ретінде Қазақстан Республикасының Азаматтық кодексінде белгіленген тәртіппен және мөлшерде тұрақсыздық айыбын төлеуге міндетті.

## **6. САҚТАНДЫРУ ШАРТЫН ЖАСАУ ТӘРТІБІ**

**6.1.** Жеке нотариустардың жауапкершілігін міндетті сақтандыру осы Заңға және Қазақстан Республикасының Азаматтық кодексіне сәйкес Сақтандырушы мен Сақтанушы арасында жеке нотариус нотариаттық іс-әрекеттерді жүзеге асыру кезінде мүліктік мүдделеріне зиян келтірілуі мүмкін үшінші тұлғаның пайдасына жасалатын шарттың негізінде жүзеге асырылады. Жеке нотариустардың жауапкершілігін міндетті сақтандыру шарты міндетті сақтандырудың осы түрі бойынша қызметті жүзеге асыру құқығына лицензиясы бар Сақтандырушымен ғана жасалады. Қазақстан Республикасының заңдарында көзделген жағдайларды қоспағанда, аталған Сақтандырушы үшін мұндай шартты жасасу міндетті болып табылады.

**6.2.** Жеке нотариус өзінің азаматтық-құқықтық жауапкершілігін міндетті сақтандыру шартын нотариаттық іс-әрекеттерді бастағанға дейін жасасуға міндетті.

**6.3.** Жеке нотариустардың жауапкершілігін міндетті сақтандыру шартында Сақтанушының нотариаттық іс-әрекеттерді жасауы кезінде үшінші тұлғаларға келтірілген зиянның салдарынан

туындаған міндеттемелер бойынша моральдық шығынды, ала алмаған пайданы өтеуді және тұрақсыздық айыбын төлеуді қоспағанда, сақтандыру төлемін жүзеге асыру көзделеді.

**6.4.** Жеке нотариустардың жауапкершілігін міндетті сақтандыру шарты сақтандыру полисін Сақтандырушының электрондық нысанда ресімдеуі арқылы жасалады.

**6.5.** Сақтанушының қалауы бойынша жеке нотариустардың жауапкершілігін міндетті сақтандыру шарты Сақтандырушыға жазбаша жүгіну не Сақтанушы мен Сақтандырушы арасында электрондық ақпараттық ресурстар алмасу арқылы жасалуы мүмкін.

**6.6.** Сақтандыру шартында көрсетілуге жататын талаптардың толық болмағаны үшін Сақтандырушы жауапты болады. Сақтандыру шарты бойынша оның жекелеген талаптарының толық болмауы салдарынан дау туындаған жағдайда, дау Сақтанушының пайдасына шешіледі.

**6.7.** Жеке нотариустардың жауапкершілігін міндетті сақтандыру бойынша сақтандыру полисінің мазмұны мен ресімделуі жөніндегі талаптар Қазақстан Республикасының сақтандыру және сақтандыру қызметі туралы заңнамасында белгіленеді. Жеке нотариустардың жауапкершілігін міндетті сақтандыру шартының жазбаша нысанын сақтамау – оны жарамсыз деп тануға әкеп соқтырады.

**6.8.** Егер жеке нотариустардың жауапкершілігін міндетті сақтандыру шарты Сақтанушының немесе үшінші тұлғалардың жағдайын Заңда көзделгенмен салыстырғанда нашарлататын талаптармен жасалса, онда сақтандыру жағдайы басталған кезде Сақтандырушы Сақтанушы мен үшінші тұлғалардың алдында Заңда белгіленген талаптар бойынша міндетті болады.

**6.9.** Жеке нотариустардың жауапкершілігін міндетті сақтандыру шартын электрондық нысанда жасасу және сол бойынша сақтандыру жағдайларын реттеу кезінде дерекқор қалыптастыру және жүргізу жөніндегі ұйым, Сақтандырушы және Сақтанушы (пайда алушы) арасында электрондық ақпараттық ресурстар алмасу үшін Сақтандырушының интернет-ресурсы және (немесе) ақпараттық жүйесі пайдаланылады.

**6.10.** Жеке нотариустардың жауапкершілігін міндетті сақтандыру шартын электрондық нысанда жасасу үшін өтініш беру кезінде Сақтанушыдан мамандандырылған бағдарламалық қамтылымды пайдалану талап етілмейді.

**6.11.** Сақтандыру шартын электрондық нысанда жасасу және сол бойынша сақтандыру жағдайларын реттеу үшін пайдаланылатын Сақтандырушының интернет-ресурсына сілтеме Дерекқорды қалыптастыру және жүргізу жөніндегі ұйымның интернет-ресурсында орналастырылады.

**6.12.** Дерекқорды қалыптастыру және жүргізу жөніндегі ұйым мен Сақтандырушы арасында, Сақтандырушы мен Сақтанушы (сақтандырылушы, пайда алушы) арасында электрондық ақпараттық ресурстармен алмасу тәртібі қаржы нарығы мен қаржы ұйымдарын реттеу, бақылау және қадағалау жөніндегі уәкілетті органның нормативтік құқықтық актісінде белгіленеді.

**6.13.** Жеке нотариустардың жауапкершілігін міндетті сақтандыру шартын Сақтандырушының интернет-ресурсын пайдалана отырып жасасу кезінде Сақтандырушы:

1) Сақтанушыға жеке нотариустардың жауапкершілігін міндетті сақтандыру шартын жасасу не оны жасасудан бас тарту (бас тарту себептерін көрсете отырып) туралы хабарламаны электрондық хабар түрінде дереу жөнелтуді;

2) Сақтанушының жасалған сақтандыру шарты бойынша ақпаратты Сақтандырушының интернет-ресурсында тексеру мүмкіндігін;

3) Сақтанушы (сақтандырылушы, пайда алушы) үшін Сақтандырушының интернет-ресурсына тәулік бойы қол жеткізуді қамтамасыз ете отырып, сақтандыру шартының электрондық нысанда сақталуын;

4) Сақтанушыға (Пайда алушыға) мыналар:

а) сақтандыру шартын жасау және өзгерту;

б) жеке нотариустардың жауапкершілігін міндетті сақтандыру шартын мерзімінен бұрын тоқтату;

в) сақтандыру жағдайының (сақтандыру жағдайы ретінде қарастырылатын оқиғаның) басталғаны туралы хабардар ету;

г) келтірілген зиян мөлшерін айқындау;

д) сақтандыру төлемін алу;

е) Заңның 19-1. бабында көзделген ерекшеліктерді ескере отырып, сақтандыру шартынан туындайтын дауларды реттеу үшін қажет ақпаратты (өтініштер, хабарламалар және (немесе) өзге де құжаттар,

мәліметтер) электрондық нысанда жасау және Сақтандырушыға жөнелту мүмкіндігін қамтамасыз етуге міндетті.

**6.14.** Жеке нотариустардың жауапкершілігін міндетті сақтандыру шартын жасасу туралы хабарлама дерекқорды қалыптастыру және жүргізу жөніндегі ұйымнан жіберіледі.

**6.15.** Жеке нотариустардың жауапкершілігін міндетті сақтандыру шартын жасасу туралы хабарламаның тәртібі мен мазмұнына қойылатын талаптарды уәкілетті орган айқындайды.

**6.16.** Егер жеке нотариустардың жауапкершілігін міндетті сақтандыру шартында өзгеше көзделмесе, жеке нотариустардың жауапкершілігін міндетті сақтандыру шартын Сақтандырушының интернет-ресурсын пайдалана отырып жасасу кезінде, осы сақтандыру шарты Сақтанушы сақтандыру сыйлықақысын (сақтандыру сыйлықақысын бөліп төлеген жағдайда, бірінші сақтандыру жарнасын) төлеген күннен бастап жасалды деп есептеледі.

**6.17.** Жеке нотариустардың жауапкершілігін міндетті сақтандыру шартын Сақтандырушының интернет-ресурсын пайдалана отырып жасасу кезінде Сақтанушы осы Ережеде, Заңда көзделген сақтандыру талаптарымен танысқаннан кейін сақтандыру сыйлықақысын (сақтандыру сыйлықақысын бөліп төлеген жағдайда, бірінші сақтандыру жарнасын) төлейді, сол арқылы өзіне ұсынылған талаптарда осы қосылу шартын жасасуға өзінің келісетінін растайды.

**6.18.** Сақтандырушы жеке нотариустардың жауапкершілігін міндетті сақтандыру шарттарын Сақтандырушының интернет-ресурсын пайдалана отырып жасасу мүмкіндігін тәулік бойы қамтамасыз етеді.

**6.19.** Сақтандыру агенттерінің нысан иелерінің жауапкершілігін міндетті сақтандыру шарттарын жасасу жөніндегі қызметіне жол берілмейді.

**6.20.** Сақтандырушы сақтандыру сыйлықақысын Сақтандырушының интернет-ресурсы арқылы қолма-қол ақшасыз тәсілмен төлеу мүмкіндігін береді.

**6.21.** Сақтандырушы сақтандырушының интернет ресурсын және (немесе) басқа ұйымдардың интернет-ресурстарын пайдаланған кезде «Сақтандыру қызметі туралы» Заңның 15-2. бабының 1-тармағына және 2-тармағының екінші бөлігіне сәйкес, уәкілетті органның нормативтік құқықтық актіінде белгіленген тәртіпте, Сақтанушыға (сақтандырылушыға) сақтандыру келісімшартының қолданыс мерзімі аяқталғаны туралы алдын ала хабарлауды қамтамасыз етеді.

## **7. САҚТАНДЫРУ ШАРТЫНЫҢ ҚОЛДАНЫС МЕРЗІМІ МЕН ЖЕРІ**

**7.1.** Егер жеке нотариустардың жауапкершілігін міндетті сақтандыру шартында өзгеше көзделмесе, онда ол Сақтанушы сақтандыру сыйлықақысын төлеген, ал оны мерзімін ұзартып төлеген кезде - бірінші сақтандыру жарнасын төлеген кезден бастап күшіне енеді және тараптар үшін міндетті болады.

**7.2.** Сақтандыру шарты күшіне енгізілген күннен бастап 12 (он екі) ай мерзімге жасалады. .

**7.3.** Сақтандырушылық қорғаудың қолданылу кезеңі сақтандыру шартының қолданылу мерзімімен сәйкес келеді.

**7.4.** Егер сақтандыру шартында өзгеше көзделмесе, сақтандыру шартының қолданылуы Қазақстан Республикасының аумағымен шектеледі.

## **8. ТАРАПТАРДЫҢ ҚҰҚЫҚТАРЫ МЕН МІНДЕТТЕР**

### **8.1. Сақтандырушы:**

1) жеке нотариустардың жауапкершілігін міндетті сақтандыру шартын жасасқан кезде Сақтанушыдан жеке нотариустардың жауапкершілігін міндетті сақтандырудың осының алдындағы шарттары, сақтандыру жағдайлары, сақтандыру төлемдері туралы ақпаратты және Қазақстан Республикасының Азаматтық кодексінде көзделген жеке нотариустардың жауапкершілігін міндетті сақтандыру шартына енгізу үшін қажетті өзге де мәліметтерді беруін талап етуге;

2) Сақтанушы келтірген зиянды өтеу туралы үшінші тұлғалардың талаптарына байланысты мәселелерді реттеуге қатысуға;

3) «Жеке нотариустардың азаматтық-құқықтық жауапкершілігін міндетті сақтандыру туралы» Заңда көзделген жағдайларда келтірілген зиян үшін жауапты тұлғаға кері талап құқығын қоюға;

4) осы Сақтандыру ережесінің 12-тарауында көзделген негіздер бойынша сақтандыру төлемін толық немесе ішінара жүзеге асырудан бас тартуға құқылы;

5) Сақтандырушының Қазақстан Республикасының заңнамалық актілеріне қайшы келмейтін басқа құқықтары.

### **8.2. Сақтандырушы:**

1) Сақтанушыны жеке нотариустардың жауапкершілігін міндетті сақтандыру шарттарымен таныстыруға, оның жеке нотариустардың жауапкершілігін міндетті сақтандыру шартынан туындайтын құқықтары мен міндеттерін түсіндіруге және соның талабы бойынша Сақтандыру ережесінің ккшірмесін ұсынуға (жіберуге);

2) жеке нотариустардың жауапкершілігін міндетті сақтандыру шарты бойынша сақтандырып қорғаудың қолданысы кезеңінде басталған сақтандыру жағдайы (сақтандыру жағдайы ретінде қаралатын оқиға) туралы хабардар етілген кезінде оны уәкілетті органның нормативтік құқықтық актісіне сәйкес дереу тіркеуге және дерекқорды қалыптастыру және жүргізу жөніндегі ұйымға осы сақтандыру жағдайы (сақтандыру жағдайы ретінде қаралатын оқиға) жөнінде мәліметтер ұсынуға;

3) Қазақстан Республикасының азаматтық заңдарында белгіленген жағдайларда және тәртіппен жеке нотариустардың жауапкершілігін міндетті сақтандыру шартын мерзімінен бұрын тоқтатқан кезде Сақтанушыға сақтандыру сыйлықақысын толық немесе ішінара қайтаруға;

4) сақтандыру жағдайының басталу фактісін және Сақтандырушы өтеуге тиісті зиянның мөлшерін растайтын құжаттар жеткіліксіз болған кезде жетіспейтін және (немесе) дұрыс ресімделмеген құжаттардың толық тізбесін көрсете отырып, оларды алған күннен бастап үш жұмыс күні ішінде бұл туралы өтініш берушіге хабарлауға;

5) сақтандыру жағдайы басталған кезде сақтандыру төлемін осы Сақтандыру ережесінде көзделген тәртіппен және шарттар бойынша жүргізуге;

6) Сақтанушыға оның сақтандыру жағдайы кезінде шығындарды болдырмау немесе азайту мақсатында жұмсаған шығыстарын өтеуге;

7) сақтандыру құпиясын қамтамасыз етуге;

8) сақтандыру төлемін уақтылы жүзеге асырмаған кезде Пайда алушыға Қазақстан Республикасының Азаматтық кодексінде белгіленген тәртіппен және мөлшерде тұрақсыздық айыбын төлеуге міндетті;

9) Сақтанушыдан (Пайда алушыдан) өтінішті алған кезде бес жұмыс күні ішінде Сақтанушының (Пайда алушының) талабын қарауға және дауды одан әрі реттеу тәртібін көрсете отырып, жазбаша жауап беруге;

10) Сақтанушыдан (Пайда алушыдан) сақтандыру омбудсманына жіберілетін өтінішті алған кезде осы өтінішті, сондай-ақ оған қоса берілетін құжаттарды алынған күнінен бастап үш жұмыс күні ішінде сақтандыру омбудсманына қайта жіберуге;

11) Сақтандырушының Қазақстан Республикасының заңнамалық актілеріне қайшы келмейтін басқа міндеттері.

### **8.3. Сақтанушы:**

1) Сақтандырушыдан жеке нотариустардың жауапкершілігін міндетті сақтандырудың талаптарын, жеке нотариустардың жауапкершілігін міндетті сақтандыру шарты бойынша өздерінің құқықтары мен міндеттерін түсіндіруді талап етуге;

2) Сақтандырушының қаржылық есептілігімен танысуға;

3) сақтандыру төлемін осы Сақтандыру ережесінде көзделген тәртіппен және талаптар бойынша алуға;

4) "Сақтандыру қызметі туралы" Қазақстан Республикасының Заңында көзделген ерекшеліктерді ескере отырып, өтінішті және қоса берілетін құжаттарды сақтандыру омбудсманына (тікелей сақтандыру омбудсманына, оның ішінде оның интернет-ресурсы арқылы не Сақтандырушы, оның ішінде оның филиалы, өкілдігі, өзге де оқшауланған құрылымдық бөлімшесі, интернет-ресурсы арқылы) жіберуге құқылы;

5) Сақтандырушы (оның ішінде Сақтандырушының интернет-ресурсы арқылы) жүргізген, келтірілген зиянның мөлшерін бағалау нәтижелерімен және сақтандыру төлемі мөлшерінің есеп-қисаптарымен танысуға;

6) жеке нотариустардың жауапкершілігін міндетті сақтандыру шартынан туындайтын мәселелерді реттеу үшін Заңның 19-1-бабында көзделген ерекшеліктерді ескере отырып Сақтандырушыға не сақтандыру омбудсманына немесе сотқа жүгінуге;

7) Сақтанушының Қазақстан Республикасының заңнамалық актілеріне қайшы келмейтін басқа құқықтары.

#### **8.4. Сақтанушы:**

1) сақтандыру сыйлықақысын жеке нотариустардың жауапкершілігін міндетті сақтандыру шартында белгіленген мөлшерде, тәртіппен және мерзімдерде төлеуге;

2) жеке нотариустардың жауапкершілігін міндетті сақтандыру шартын жасасқан кезде Сақтандырушыға осы Заңның талаптарына сәйкес мәліметтерді ұсынуға;

3) сақтандыру шартын жасау кезінде Сақтандырушыға хабарлаған мән-жайларда өзіне белгілі болған едәуір өзгерістер туралы, егер ол өзгерістер сақтандыру жағдайының артуына ықпал ететін болса, Сақтандырушыға шұғыл түрде, бірақ 3 (үш) жұмыс күнінен кешіктірмей хабарлауға;

4) басталуына орай Сақтанушыда келтірілген зиянды өтеу міндеті туындаған оқиғаның себептері, барысы және салдары, сондай-ақ келтірілген зиянның сипаты мен мөлшерлері туралы талдау жасауға мүмкіндік беретін, өзінің қолы жеткен барлық ақпаратты және құжаттаманы Сақтандырушыға ұсынуға;

5) үшінші тұлғалардың зиянды өтеу туралы талаптарына байланысты мәселелерді реттеуге қатысуы үшін Сақтандырушыға мүмкіндік жасауға;

6) сақтандыру жағдайынан болатын шығындарды болдырмау немесе азайту жөніндегі шараларды қолдануға;

7) сақтандыру жағдайының басталуына жауапты тұлғаға кері талап қою құқығының Сақтандырушыға өтуін қамтамасыз етуге.

8) Сақтанушы нотариаттық әрекеттер жасау бойынша қызметтер көрсеткен тұлғаны жеке нотариустың нотариаттық әрекеттерді жасауы салдарынан үшінші тұлғалардың мүліктік мүдделеріне келтірілген зиянды өтеу бойынша өзінің азаматтық-құқықтық жауапкершілігін сақтандыру туралы хабардар етуге міндетті;

9) Сақтанушының Қазақстан Республикасының заңнамалық актілерінде қайшы келмейтін басқа міндеттері.

## **9. САҚТАНДЫРУ ТӨЛЕМІН ТӨЛЕУ ҮШІН ҚАЖЕТ ҚҰЖАТТАР**

**9.1.** Сақтандырушы сақтандыру төлемін төлеу туралы шешім қабылдауы үшін Сақтанушы немесе зардап шеккен (Пайда алушы) келесідей құжаттарды береді:

1) сақтандыру төлемі туралы өтініш;

2) үшінші тұлғалардың зиянды өтеу туралы, келтірілген зиянды және оның мөлшерін растайтын құжаттар қоса берілген талабы немесе нотариаттық іс-әрекеттерді жасау нәтижесінде Сақтанушы келтірген зиянды өтеу туралы соттың заңды күшіне енген шешімі;

3) Пайда алушының жеке басы куәлігінің (жеке тұлға үшін) көшірмесі немесе заңды тұлғаның өкіліне берілген сенімхат;

4) зиянды болдырмау және мөлшерін азайту жөнінде шаралар қолдануға байланысты шығыстарды растайтын құжаттар.

**9.2.** Құжаттарды қабылдаған Сақтандырушы ұсынылған құжаттардың толық тізбесін және оларды қабылдау күнін көрсете отырып, өтініш берушіге анықтама беруге міндетті.

**9.3.** Сақтанушы (Пайда алушы) сақтандыру төлемі туралы талабын электрондық нысанда жөнелткен жағдайда, Сақтандырушы оған осы анықтаманы электрондық нысанда ұсынуы мүмкін.

**9.4.** Сақтандыру жағдайын электрондық нысанда реттеу үшін өтініш берген кезде Сақтанушыдан мамандандырылған бағдарламалық қамталымды пайдалану талап етілмейді.

## **10. САҚТАНДЫРУ ТӨЛЕМДЕРІН ТӨЛЕУ ТӘРТІБІ МЕН ШАРТТАРЫ**

**Сақтандыру жағдайын және сақтандыру төлемінің мөлшерін айқындау.**

**10.1.** Сақтандыру жағдайы Сақтанушы келтірген зиянды өтеу туралы соттың шешімі заңды күшіне енген не Сақтанушының үшінші тұлғалардың зиянды өтеу туралы талаптарын негізді деп таныған және Сақтанушының талаптарды тануына Сақтандырушы келіскен күннен басталған деп есептелінеді.

**10.2.** Сақтандыру төлемінің мөлшерін Сақтандырушы үшінші тұлғалар талап еткен сомаға немесе соттың осы Сақтандыру ережесінің 6.3-тармағына сәйкес келтірілген зиянды өтеу туралы шешімі заңды күшіне енуіне орай айқындайды.

**10.3.** Сақтанушының шығынды болдырмау немесе азайту мақсатында шеккен шығыстары, егер мұндай шығыстар қажетті болса немесе Сақтандырушының нұсқауларын орындау үшін жұмсалса, егер тиісті шаралар тіпті сәтсіз болса да, Сақтандырушының өтеуіне жатады.

Мұндай шығыстар нақты мөлшерінде өтеледі, бірақ сақтандыру төлемінің және шығыстар өтемінің жалпы сомасы жеке нотариустардың жауапкершілігін міндетті сақтандыру шартында көзделген сақтандыру сомасынан аспауға тиіс, егер шығыстар Сақтанушы Сақтандырушының нұсқауларын орындауы нәтижесінде туындаған болса, олар сақтандыру сомасына қатыссыз толық мөлшерінде өтеледі.

#### **Франшиза**

**10.4.** Әрбір сақтандыру жағдайы бойынша франшизаның мөлшері тараптардың келісімі бойынша белгіленеді, бірақ бұл ретте жеке нотариустардың жауапкершілігін міндетті сақтандыру шартында белгіленген сақтандыру сомасының бес процентінен аспауға тиіс. Келтірілген зиянның мөлшері франшизаның белгіленген мөлшерінен асып кеткен жағдайларда сақтандыру төлемі толық мөлшерде жүзеге асырылады.

#### **Сақтандыру төлемін жүзеге асырудың талаптары және тәртібі**

**10.5.** Сақтанушы не үшінші тұлға Сақтандырушыға сақтандыру төлемі туралы талапты сақтандыру төлемін жүзеге асыруға қажетті құжаттарды қоса бере отырып, уәкілетті органның нормативтік құқықтық актісіне сәйкес жазбаша нысанда, оның ішінде Сақтандырушының интернет-ресурсы арқылы қояды.

Сақтандырушының талап етуі бойынша өтініш беруші Сақтандырушы қол жеткізе алатын мемлекеттік органдардың дерекқорларында және (немесе) ақпараттық жүйелерінде электрондық нысанда бар құжаттарды қоспағанда, Сақтандырушыға сақтандыру төлемін жүзеге асыруға қажетті құжаттардың түпнұсқаларын ұсынуға міндетті.

**10.6.** Сақтандырушы сақтандыру төлемін жүзеге асырған кезде Пайда алушыдан оның Сақтандырушыға талап қою құқығын шектейтін шарттар қабылдауын талап етуге құқылы емес.

**10.7.** Сақтандырушы сақтандыру төлемін осы Сақтандыру ережесінің 9.1-тармағында көзделген құжаттарды алған күннен бастап 7 (жеті) жұмыс күнінен кешіктірмей жасайды.

**10.8.** Сақтандыру төлемінің мөлшеріне жеке нотариустардың жауапкершілігін міндетті сақтандыру шартының тараптары немесе үшінші тұлғалар дау айтқан жағдайларда Сақтандырушы сақтандыру төлемін осы Сақтандыру ережесінің 10.7-тармағында белгіленген мерзім ішінде аталған тұлғалардың бірде-бірі дау айтпаған бөлігінде жүзеге асыруға міндетті.

Сақтандыру төлемінің дау айтылған бөлігін Сақтандырушы бітім келісімі жасалған және оны сот бекіткен күннен бастап 3 (үш) жұмыс күні ішінде, не, егер сот шешімді шұғыл түрде орындауды ұйғармаса, осы дау бойынша соттың шешімі заңды күшіне енген күннен бастап төлеуі тиіс.

**10.9.** Жеке нотариустардың жауапкершілігін міндетті сақтандыру шартының қолданылу кезеңінде үшінші тұлғалардың мүліктік мүдделеріне келтірілген зиян үшін сақтандыру төлемі туралы талап Сақтандырушыға сақтандыру жағдайы басталған кезден бастап 3 (үш) жыл ішінде қойылуы мүмкін.

#### **Пайда алушы**

**10.10.** Жеке нотариустың жекелеген нотариаттық іс-әрекеттерді жасауы нәтижесінде зиян келтірілген үшінші тұлға, ал үшінші тұлға қайтыс болған жағдайда (қайта ұйымдастырылғанда) - оның мұрагерлері (құқық мирасқорлары) Пайда алушы болып табылады.

**10.11.** Сақтанушы немесе үшінші тұлғаға (мұрагерлерге (құқық мирасқорларына) келтірілген зиянды Сақтандырушының Заңда белгіленген жауапкершілігі көлемінің шегінде өтеген және өз

шығындарының сақтандырушыдан өтелуіне құқық алған Сақтанушы немесе өзге де тұлға Пайда алушы болып табыла алады.

**10.12.** Сақтандырушының интернет-ресурсын пайдалану арқылы сақтандыру шарты бойынша сақтандыру жағдайларын реттеу кезінде Сақтандырушы келесілерді қамтамасыз етуге міндетті:

1) сақтандыру жағдайын реттеу процессінің негізгі кезеңдері туралы, оған реттеу үшін құжаттарды қабылдаудан бас тартуды (бас тартудың себептерін көрсетіп) қоса, уәкілетті органның нормативтік құқықтық актімен белгіленген тәртіпте электрондық түрде Сақтанушыға (сақтандырылушыға) хабарлау;

2) Сақтанушының (сақтандырылушының, пайда алушының) көлік құралдары иелерінің жауапкершілігін міндетті сақтандыру шарты бойынша сақтандыру жағдайына қатысты ақпаратты Сақтандырушының интернет-ресурсында тексеру мүмкіндігі;

3) Сақтанушы (сақтандырылушы, пайда алушы) үшін Сақтандырушының интернет-ресурсына тәулік бойы қол жеткізуді қамтамасыз етумен электрондық нысанда сақтандыру шарты бойынша сақтандыру жағдайына қатысты ақпаратты сақтау.

**10.13.** Сақтандырушы тәулік бойы Сақтандырушының интернет-ресурсын пайдаланып, сақтандыру шарты бойынша сақтандыру жағдайын реттеу мүмкіндігін қамтамасыз етеді.

**10.14.** Сақтандыру шарты бойынша сақтандыру жағдайын реттеу туралы хабарлама дерекқор қалыптастыру және жүргізу жөніндегі ұйымның атынан жіберіледі.

## **11. ЗИЯН КЕЛТІРГЕН ТҰЛҒАҒА КЕРІ ТАЛАП ҚОЮ ҚҰҚЫҒЫ**

**11.1.** Сақтандыру төлемін жүзеге асырған Сақтандырушының Сақтанушыға төленген сома шегінде мынадай жағдайларда:

1) Сақтанушы сақтандыру жағдайының туындауына бағытталған не оның басталуына ықпал ететін қасақана іс-әрекеттер жасағанда;

2) Сақтанушы Қазақстан Республикасының заңнамалық актілерінде белгіленген тәртіппен сақтандыру жағдайымен себептік байланыстағы қасақана қылмыстық не әкімшілік құқық бұзушылықтар деп танылған әрекеттер жасағанда;

3) Сақтанушының зиянның мөлшерін азайту жөнінде қисынды және қол жетімді шараларды қасақана қолданбауы нәтижесінде зиянның мөлшері ұлғайғанда;

4) Сақтанушы Сақтандырушыға сақтандыру объектісі, сақтандыру тәуекелі, сақтандыру жағдайы және оның салдары туралы көрінеу жалған мәліметтерді хабарлағанда;

5) Сақтанушы сақтандыру жағдайының басталуына жауапты тұлғаға өзінің талап қою құқығынан бас тартқанда, сондай-ақ Сақтандырушыға талап қою құқығының өтуі үшін қажетті сақтандыру құжаттарын беруден бас тартқанда кері талап қоюға құқығы бар.

**11.2.** Сақтандыру төлемін жүзеге асырған Сақтандырушыға Сақтанушының сақтандыру нәтижесінде Сақтандырушы өтеген шығындар үшін жауапты тұлғаға кері талап қою құқығы төленген сома шегінде ауысады.

## **12. САҚТАНДЫРУШЫНЫ САҚТАНДЫРУ ТӨЛЕМІН ТӨЛЕУДЕН БОСАТУ. САҚТАНДЫРУ ТӨЛЕМІН ТӨЛЕУДЕН БАС ТАРТУ**

**12.1.** Сақтандырушы егер сақтандыру жағдайы:

1) үшінші тұлғалардың сақтандыру жағдайының туындауына бағытталған не оның басталуына ықпал ететін қасақана іс-әрекеттерінің;

2) үшінші тұлғалардың Қазақстан Республикасының заңнамалық актілерінде белгіленген тәртіппен сақтандыру жағдайымен себептік байланыстағы қасақана қылмыстық немесе әкімшілік құқық бұзушылықтар деп танылған әрекеттерінің;

3) Сақтанушының нотариустың Қазақстан Республикасының нотариат туралы заңдарында белгіленген функциялары мен міндеттеріне сәйкес келмейтін қызметті жүзеге асыруының;

4) Сақтанушы Қазақстан Республикасының нотариат туралы заңдарын нотариус қызметінің аумағына қатысты талаптарын бұза отырып жасаған нотариаттық іс-әрекеттердің салдарынан болса сақтандыру төлемін толық немесе ішінара төлеуден бас тартуға құқылы.

**12.2.** Сақтандырушының сақтандыру төлемін жүзеге асыруда асырудан бас тартуы үшін мыналар да:

- 1) Сақтанушының шығынды келтіруге кінәлі тұлғадан шығынның тиісті өтемін алуы;
- 2) Заңда белгіленген жағдайларды қоспағанда, сақтандыру жағдайының басталуы туралы Сақтандырушыға хабарламау немесе уақтылы хабарламау;
- 3) Сақтанушының сақтандыру жағдайы басталуының мән-жайларын тексеру және келтірілген зиянның мөлшерін белгілеу кезінде Сақтандырушыға кедергі келтіруі негіз болуы мүмкін.

**12.3.** Егер Сақтандыру жағдайының басталғаны туралы Сақтандырушыға хабарламау немесе уақтылы хабарламау Сақтанушының еркіне байланысты емес себептермен негізделсе немесе сақтандыру шартымен дәлелді себептерге жатқызылса және аталған фактіні растайтын тиісті құжаттар ұсынылған болса, ол жағдай сақтандыру төлемін төлемеу үшін негіз болып табылмайды.

**12.4.** Сақтандырушы, егер сақтандыру жағдайы:

- 1) ядролық жарылыстың, радиацияның немесе радиоактивтік уланудың әсері;
- 2) соғыс қимылдарының;
- 3) азамат соғысының, түрлі сипаттағы халық толқуларының, жаппай тәртіпсіздіктердің немесе ереуілдердің салдарынан туындаса, сақтандыру төлемін жүзеге асырудан босатылады.

**12.5.** Сақтандыру төлемінен бас тарту үшін негіздер бар кезде Сақтандырушы осы Сақтандыру ережесінің 9-тарауында көзделген құжаттарды алған күннен бастап жеті жұмыс күні ішінде сақтандыру төлемі туралы өтініш берген тұлғаға бас тарту себептерінің уәжді негіздемесімен және Сақтанушының (Сақтандырылушының, Пайда алушының) Қазақстан Республикасы заңнамасының ерекшеліктерін ескере отырып, келіспеушіліктерді реттеу үшін сақтандыру омбудсманына жүгіну құқығы туралы хабарламамен сақтандыру төлемінен толық немесе ішінара бас тарту туралы тиісті шешімді жазбаша нысанда жіберуге міндетті.

**12.6.** Сақтандырушының осы тарауда көзделмеген негіздер бойынша сақтандыру төлемінен бас тартуға құқығы жоқ.

**12.7.** Сақтандыру омбудсманы дауды реттеу тәртібін сақтаған жағдайда Сақтандырушының сақтандыру төлемін төлеуден бас тартуы жайында Қазақстан Республикасының заңдарымен көзделген тәртіпте және шарттармен Сақтанушының (Сақтандырылушының) және (немесе) Пайда алушы болып табылатын өзге тұлғаның сотқа шағымдануына болады.

### **13. САҚТАНДЫРУ ШАРТЫН ӨЗГЕРТУ**

**13.1.** Сақтандыру шартына өзгертулер мен толықтырулар енгізуге жол берілмейді.

### **14. САҚТАНДЫРУ ШАРТЫН ТОҚТАТУ ШАРТТАРЫ**

**14.1.** Сақтандыру шарты мынадай жағдайларда:

- 1) сақтандыру шартының қолданылу мерзімі аяқталғанда;
- 2) сақтандыру шарты мерзімінен бұрын тоқтатылғанда;
- 3) Сақтандырушы сақтандыру төлемін (сақтандыру төлемдерін) жеке нотариустардың жауапкершілігін міндетті сақтандыру шартының талаптарында белгіленген сақтандыру сомасы мөлшерінде жүзеге асырғанда өзінің қолданылуын тоқтатады.

**14.2.** Жеке нотариустардың жауапкершілігін міндетті сақтандыру шартын мерзімінен бұрын тоқтатудың тәртібі, шарттары және салдары Қазақстан Республикасының азаматтық заңдарына сәйкес айқындалады.

### **15. ЖЕКЕ НОТАРИУСТАРДЫҢ ЖАУАПКЕРШІЛІГІН МІНДЕТТІ САҚТАНДЫРУ ШАРТЫНЫҢ ЖАРАМСЫЗДЫҒЫ**

**15.1.** Жеке нотариустардың жауапкершілігін міндетті сақтандыру шартын жарамсыз деп танудың шарттары, негіздері және салдары Қазақстан Республикасының азаматтық заңдарына сәйкес айқындалады.

## 16. ЖЕКЕ НОТАРИУСТАРДЫҢ АЗАМАТТЫҚ-ҚҰҚЫҚТЫҚ ЖАУАПКЕРШІЛІГІН МІНДЕТТІ САҚТАНДЫРУ БОЙЫНША ДАУЛАРДЫ РЕТТЕУДІҢ ЕРЕКШЕЛІГІ

**16.1.** Жеке нотариустардың жауапкершілігін міндетті сақтандыру шартынан туындайтын дау болған кезде Сақтанушы (Пайда алушы) талаптарын көрсетіп және өзінің талабын растайтын құжаттарды қоса бере отырып, жазбаша өтінішін Сақтандырушыға (оның ішінде Сақтандырушының филиалы, өкілдігі, интернет-ресурсы арқылы) жіберуге не "Сақтандыру қызметі туралы" Қазақстан Республикасының Заңында көзделген ерекшеліктерді ескере отырып, жеке нотариустардың жауапкершілігін міндетті сақтандыру шартынан туындайтын дауларды реттеу үшін өтінішін сақтандыру омбудсманына (тікелей сақтандыру омбудсманына, оның ішінде оның интернет-ресурсы арқылы не Сақтандырушы арқылы, оның ішінде оның филиалы, өкілдігі, өзге де оқшауланған құрылымдық бөлімшесі, интернет-ресурсы арқылы) немесе сотқа жіберуге құқылы.

**16.2.** Сақтандырушы Сақтанушыдан (Пайда алушыдан) өтінішті алған кезде оны бес жұмыс күні ішінде қарайды және дауды одан әрі реттеу тәртібін көрсете отырып жазбаша жауап береді.

**16.3.** Сақтанушы (Пайда алушы) сақтандыру омбудсманына өтініш жасаған жағдайда, Сақтандырушы Сақтанушының (Пайда алушының), сақтандыру омбудсманының сұрау салуы бойынша дауды қарауға және шешуге қатысты құжаттарды сұрау салу алынған күннен бастап үш жұмыс күні ішінде ұсынуға міндетті.

## 17. ҚОСЫМША ЕРЕЖЕЛЕР

**17.1.** Қазақстан Республикасының жеке нотариустардың азаматтық-құқықтық жауапкершілігін міндетті сақтандыру туралы заңдарын бұзуға кінәлі тұлғалар Қазақстан Республикасының заңдарына сәйкес жауаптылықта болады.

**17.2.** Сақтанушы өзінің қолтаңбасымен Сақтандырушының немесе үшінші тұлғаның №94-V «Дербес деректер және оларды қорғау туралы» Қазақстан Республикасының Заңына сәйкес Сақтанушының, Сақтандырылушының (Пайда алушының) дербес деректерін жинауға, өңдеуге, сақтауға және беруге өз келісімін, сондай-ақ Сақтандырылушының (Пайда алушының) келісімін береді:

1) «Мемлекеттік кредиттік бюро» Акционерлік қоғамынан (бұдан әрі – Бюро) Сақтандырушының деректер алуына;

2) мемлекеттік деректер базасы иелерінің Бюроға Сақтанушы (Сақтандырылушы, Пайда алушы) туралы ақпаратты тікелей немесе үшінші тұлғалар туралы беруіне;

3) Қазақстан Республикасы Үкіметінің шешімімен Қазақстан Республикасының заңнамасына сәйкес мемлекеттік қызмет көрсету бойынша қызмет атқаратын заңды тұлғаға Сақтанушы (Сақтандырылушы (Пайда алушы) туралы қолда бар және келешекте келіп түсетін ақпаратты Бюроға және Бюро арқылы Сақтандырушыға беруге.

4) дербес деректерді шекара асырып беруге және дербес деректерді үшінші тұлғаларға беруге;

5) Сақтандырушының қызмет мақсатын жалпы іске асыру үшін Қазақстан Республикасының Азаматтық кодексінің 830-бабының 4-тармағына сәйкес Сақтандырушының сақтандыру құпиясын ашуына.

**17.3.** Сақтандырушы дербес деректерді сақтау мерзімін келешекте дербес деректерді сақтаудың қажеттілігі қалмағанша белгілейді. Дербес деректер Сақтандырушының немесе үшінші тұлғаның Шарттың және/немесе Қазақстан Республикасының заңнамасының талаптарын орындау мақсатында, сондай-ақ Сақтандырушының жалпы қызмет мақсаттарын іске асыру үшін пайдаланылады.

**17.4.** Сақтанушы Сақтандырылушының (Пайда алушының) дербес деректерін Сақтандырушының немесе үшінші тұлғаның жинауына және өңдеуіне Сақтандырылушыдан (Пайда алушыдан) жазбаша келісімін, оның ішінде Ереженің 17.2. тармақтың 1)-5) тармақшасында көрсетілген келісімін талап етуге міндетті.

**17.5.** Сақтанушы Сақтандырылушының (Пайда алушының) дербес деректерін Сақтандырушының немесе үшінші тұлғаның жинауына және өңдеуіне Сақтандырылушының (Пайда алушының) келісімінің, оның ішінде Ереженің 17.2. тармақтың 1)-5) тармақшасында көрсетілген келісімінің болмағаны үшін жауапты болады.

**17.6.** Сақтандырушы сақтандырушының интернет-ресурсын және (немесе) басқа ұйымдардың интернет-ресурстарын пайдалану кезінде «Сақтандыру қызметі туралы» Заңның 15-2. Бабының 1-тармағына және 2-тармағының екінші абзацына сәйкес, Қазақстан Республикасының дербес деректер және оларды сақтау

туралы заңнамасына сәйкес дербес деректерді жинауды және өңдеуді жүзеге асыру кезінде дербес деректерді қорғауды қамтамасыз етеді.